



KEMENTERIAN PERPADUAN NEGARA

SIARAN MEDIA

PERSIDANGAN ANTARABANGSA: SEJARAH KEDAH TUA BERDASARKAN CATATAN YI JING MENGHIMPUNKAN SEJARAWAN DALAM DAN LUAR NEGARA

KUALA LUMPUR, 11 Julai 2024 – Seramai kira-kira 500 orang penyelidik, ahli akademik dan sejarawan dari dalam dan luar negara menyertai Persidangan Antarabangsa : Sejarah Kedah Tua Berdasarkan Catatan Yi-Jing anjuran bersama Jabatan Muzium Malaysia (JMM) dan Arkib Negara Malaysia (ANM) dengan kerjasama Persatuan Kebudayaan Han Malaysia (PKHM). Majlis perasmian persidangan telah disempurnakan oleh YB Datuk Aaron Ago Dagang, Menteri Perpaduan Negara di M Resort & Hotel, Bukit Kiara, hari ini.

Persidangan Antarabangsa: Sejarah Kedah Tua Berdasarkan Catatan Yi Jing dianjurkan bagi menghimpunkan pakar sejarawan **untuk berkongsi dan membentangkan dapatan terkini berkaitan sejarah Lembah Bujang (Kedah Tua) menerusi sumber catatan Yi-Jing**. Dalam catatannya, Yi-Jing menggambarkan Kedah Tua sebagai pusat perdagangan yang maju dan masyarakatnya memiliki kebudayaan yang kaya dan unik.

Persidangan ini diadakan bersempena Hubungan Diplomatik Malaysia-China ke-50 tahun pada 2024. Persidangan Antarabangsa ini **melibatkan seramai empat (4) orang pembentang kertas kerja dari negara China, dua (2) moderator dan dua (2) ucapan utama, masing-masing dari Malaysia dan China**.

Selain itu, persidangan ini juga bertujuan untuk **melengkapkan sejarah negara secara lebih konkrit menerusi sebuah sumber luar yang diyakini kesahihannya**. Ini termasuk perbandingan secara lebih komprehensif berdasarkan penemuan terkini dalam bidang penyelidikan sejarah dan arkeologi negara.

YB Datuk Aaron Ago Dagang berkata “**Kementerian Perpaduan Negara menerusi Jabatan Muzium Malaysia dan Arkib Negara Malaysia**

merupakan dua agensi yang bertanggungjawab dalam menyelidik, mengumpul dan memelihara khazanah negara sama ada dalam bentuk bahan maujud, rekod, manuskrip dan lain-lain. Pengekalan bukti-bukti sejarah dan ketamadunan ini amat penting untuk diteruskan agar generasi masa hadapan kenal dan cintakan negara berdasarkan fakta sejarah”.

Menerusi kerjasama antara kedua-dua buah jabatan ini, kefahaman dan dapatan dapat mengukuhkan fakta ketamadunan negara yang berupaya memberi nilai tambah kepada pensejarahan negara. Selain itu, pameran mini turut diadakan menerusi penghayatan sejarah dan warisan negara dalam **memperkasa perpaduan, elemen jati diri, patriotisme serta kelestarian peradaban negara bangsa.**

Kementerian Perpaduan Negara

11 Julai 2024